

DEMASIADO CAPITAN A PONE E BARCO DI SONIDO FAYA DURANTE PRESENTACION DI QUA-SI...

Foto y Texto: Poets

Segun e soundman profesional, Cean: "Esaki ta mi prome berguensa den mi trayectoria internacional".

DEN AMBIENTE



** Riba foto por mira e soundman profesional internacional Sjong, Erick Clement un di e mihor nan aki na Aruba y Poentje Castro kende ta coordina e trabao pa Cristal Sound..

** Durante e presentacion di Super Orquesta Qua-Si, dado momento un parti di e speakernan a cay afor y asina a pone un tardansa basta largo y cu hasta mando policial a cuminsa menasa pa stop cu e evento. Pero danki na e bon cooperacion di e agentenan policial esaki no a tuma lugar, mirando cu tabata falta solamente Tatoo di Qua-Si y Oswald Tromp di Robert y su Solo Banda Show pa finalisa cu e di dos anochi.

Mirando e hecho cu Cristal Sound cu antes tabata ser maneha pa Meiller Lourens di Qua-Si y awor ta ser coordina pa Poentje Castro di EQO, e especulacionnan tabata hopi fuerte cu esaki tabata un intento di boycott.

DEN AMBIENTE a hasi un investigacion, na unda a bin constata cu tabata tin demasiado capitan riba e mixer di sonido. Por a compronde for di Dimitry Frans, cu na dado momento Poentje Castro a bin bise pa hisa e feather di e mixer, cual el a nenga rotundamente y cu esaki a ser hisa toch. Segun Daimitry cu esaki a ocasiona tur e problema, pasobra tin demasiado capitan. Di otro banda por a compronde for di Poentje cu ta Dimitry Frans mes a ocasiona e

problema aki, pues nos a keda den "YO NO FUI".

Mester bisa cu esaki ta hopi di lamenta, debi cu e crew di Cristal Sound cu ta forma pa e mihor soundmannan di Aruba cu ta Erick Clement y Dimitry Frans, kendenan a haya sosten di un profesional den persona di Cean, kende a ser contrata pa Cristal Sound specialmente pa e festival tan importante aki. Sjong ta un soundman cu tin amplio experiencia den e ramo aki cu a traha cu artistanan famoso na Trinidad manera Mighty Sparrow, Baron, Crazy etc y tambe ta tour cu artistanan di fama mundial manera Puff Daddy y hopi mas.

E persona aki mes a keda hopi desepcion na loke a pasa y mesora despues di e festival a bisa bon cla, cu desde mayan, Erick Clement y su persona so ta duna ordu pa mishi cu e equiponan. Ningun persona lo no mishi cu ningun conopi awenochi sin su autorisacion. Esaki el a bisa bon cla y "loud and clear", cual DEN AMBIENTE mes tabata testigo. Tambe el a declara cu esaki tabata e berguensa di mas grandi cu el a experiencia den su trayectoria..


HURADONAN DI CALYPSO & ROADMARCH CONTEST TIN UN TAREA HOPI DIFICIL..



** Sin duda cu e huradonan cu tabata tin e trabao pa eligi e finalistanan durante e dos recien anochinan di e pre-eliminar, tabata tin un tarea hopi dificil e aña aki. Durante e dos anochinan, ta sefta mes nan a sefta pa saca e creme de la creme, pa asina awenochi Aruba por bay presencia un final di halto nivel. Tabata tin hopi discusion tocante esnan cu no a logra di cay den final, pero e cuerpo aki ta musiconan experto den e ramo aki y mester respeta nan desicion y punto! DEN AMBIENTE ta desea e cuerpo di hurado aki hopi forza y exito awenochi pa e gran final di Calypso & Roadmarch Contest y sperando cu nan desicion lo ta esun mas corecto cu lo haya e debido respet for di e pueblo carnavalesco di Aruba...

CRISTAL FM DEMOSTRANDO CALIDAD Y PROFESIONALISMO DEN NAN TRANSMISION..

** Sin duda cu e crew profesional di Cristal FM ta demostrando calidad, nivel y caliber durante nan transmisionnan vivo i directo durante Carnaval 44. Awenochi bo por scan di tur e otro radio emisoranan y sinti e diferencia Cristalino di Cristal FM. Riba foto por aprecia e crew Cristalino forma pa e conocida Gina Ponse, Chando Colina, Dimitry Frans, Pilipe Loren, Charles Franken, Robby Rosel y Ryan Maduro...



Arubiano residencia na Hulanda..

...RAP PRIEST TA LANSA SU CD.."HOLD HANDS AND

** RAPPRIEST Arubiano nace for di e bario Weg Rooi Hundo na San Nicolas y residencia na madre patria for di su edad joven, a lansa un tremendo produccion riba mercado di Aruba. E CD ta hiba como titulo "Hold Hands And Unite" y ta contene cinco tema cayente di e ritmo calypso y soca jam.

Na Hulanda Rap Priest ta duna presentacionnan priva. Nunca el a drenta den su mente pa produci un CD, te cu despues cu el a topa cu e conocido ex Rey di Calypso Mighty Cisco di e inolvidable S-UNITED, kende pa varios aña caba ta studiando na Hulanda. Nan dos a cera cabez hunto pa traha e produccion aki, den cual Rap Priest a compone y Mighty Cisco a aregla, pa asina nan por a produci e tremendo CD aki.

Na Hulanda e tema "Nee Mevrouw" a dal masha duro mes tanto den e circulo Arubiano/Antiyanu y e propio macabientjienan. E CD aki tin tur e ingredientenan pa ser un exito aki na Aruba tambe. E persona di contacto aki na Aruba ta e conocido Mighty Red.

DEN AMBIENTE por a compronde for di su gran amigo aki na Aruba Beton Kelly di Tele Aruba, cu Rap Priest tin un deseo masha grandi pa participa otro aña den e Calypso/Roadmarch Festival y duna shownan durante e temporada importante di e celebracion di e 45 aña di Carnaval.

DEN AMBIENTE ta felicita Rap Priest pa su tremendo CD y ta desee hopi exito na Hulanda y ta spera otro aña na Aruba pa e gran celebracion di Aruba su 45 aña di Carnaval...

